

DIDZA' ZÍ'ALÖ GUSÖL-LÈ'È PABLO YÖDZÖ TESALÓNICA

Pablo rugapë' Dios bönachi queë' Cristo nacúa' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le taca bë' ta'yéajlë' bönachi Tesalónica Dios

² Rética'stu'-në' Dios: "Xclenu'" cate' röjnetu' ca naca queëli' yúgu'tëli'. Röjnética'stu' libí'ili', bi rinábitu'-në' Dios ni'a queëli' cate' rulidztu'-në'.

³ Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatíca'sili' tsutsu tu' runli' löza Xanru' Jesucristo.

⁴ Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'.

⁵ Caní naca, tu' bidxín queëli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsó' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzëjali' tu' zóalenë' Dios Bö' Lá'ayi libí'ili'.

⁷ Caní naca, chinácali' tu le naca bē' lógaca yúgu'tē bönachi ta'yéajlë' Cristo nacua' luyú Macedonia, en luyú Acaya.

⁸ Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'tē lataj guzë didza' ca réajlë'ëli' Dios. Caní naca, biti' bi run bayudxi innatu',

⁹ tu' ta'guixjö' la' léquequisö bönachi ni' queëtu' ca benli' netu' bal, en ca na' butsa' cuinli'. Bucá'anali' yugu' budó' guiöj budó' yaga, en böacali' queë' Dios para gunli' xichinë' Dios ban, Nu naca idú Dios.

¹⁰ Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguië' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'.

² Nözili' ca guca queëtu' lu yödzö Filipos, ca na' gudí'i guzxáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'.

³ Cate' ni' guchízatu' icja nágali' xtídzë'ë Dios, bē'ëtu' didza', calëga tu' nazí'i ye'e netu', en calëga tu' bi guzë ládxi'tu' le dë queëli', en biti' guxzí' yé'etu' libí'ili'.

4 Tu' nuzxöni ládxe'ë Dios netu', budödë' lu na'tu' guntu' libán que didza' dxi'a queë', ate' canísö ru'itu' didza'.

5 Nöz quézili' catu caz bé'lentü' libí'ili' didza' le gun zxön libí'ili', en biti' guléaj tsahui' cuintu' ca run nu bi rizé ladxi' le dë queéli'. Nöz quézinë' Dios naca caní.

6 Biti' gudíljatu' yöl-la' ba le naca que yödzölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasöl-lë'ë Cristo

7 guzóalentu' libí'ili' dxi'i ládxi'do', en bentu' ca runnu xiná'agacabi' bi'i hué'enido', run chí'inu légacabi' dxi'i ládxi'do'.

8 Caní guca, bidxí'ide'etu' libí'ili', ga bidxintë gú'unitu' udöditu' lu ná'ali', calëgasö didza' dxi'a queë' Dios, pero lá'tu'biqúi' udödi caztu' yöl-la' na'bán queëtu', tu' nadxí'ide'etu' libí'ili'.

9 Røjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

10 Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudáalentu' libí'ili' idú ca raza ládxe'ë Dios, en idú dxí'ado', en ca na' cuntü nu gaca bi innë que.

11 Lëscá' caní nözili' ca bentu' ca runë' tu bönni' quégacabi' zxi'inë', guchízatu' icja nágali', en butípatu' ládxi'li' tu tuli'.

12 Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

13 Que lë ni na' ca', rética'stu'-në' Dios: "Xclenu'."

Caní runtu' tu' guzxi' lu ná'ali' xtídzë'ë Dios le biyõnili' bë'ëtu' didza', calëga ca xtídza' bõnáchisõ, pero ca le nácatë naca, xtídzë'ë Dios naca. Xtídzë'ë na' run dxin lu icja lãdxi'do'oli' libí'ili', réajlë'ëli' Cristo.

¹⁴ Böchi' luzá'atu', raca queëli' ca raca quégaca bõnachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzácada'ali' lu ná'agaca bõnachi uládz queëli', lébisõ ca na' gula'guí'i gula'záquië' légaquië' lu ná'agaca bõnachi uládz quégaquië', nupa ni náacagaca bõnni' judío.

¹⁵ Yugu' bõnni' judío na' gulútië' Xanru' Jesús, en gulútië' ca' yugu' bõnni' gulu'ë didza' uláz queë' Dios. Gula'bía lãdxi'gaquië', en bulu'láguë' ca' netu'. Biti' tunë' le raza lãdxë'ë Dios, tu' cabí ta'lé'enë' dxi'a yúgu'të bõnachi izá'a.

¹⁶ Tu'záguë'ë ca' xinõztu', para cabí guntu' libán lógaca bõnachi izá'a na' bití' nabábagaca légaquië', tu' ru'í'ientu' léguequi didza' para ulu'lágaca. Caní raca, tu'zántica'së' dul-la' nabága'gaquië', en chin-abága'gaquië' xíguia' le run ga ichúguië' Dios quégaquië'.

Pablo rë'ënë' tsöjyüë' böchi'ru' nacu'ë Tesalónica

¹⁷ Na'a, böchi' luzá'atu', ruhuí'initu' ca runë' tu bõnni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la lãdxi'tu' libí'ili'. Que lë ni na', ruí'i lãdxi'rõtu' ulé'etu' loli', tu' rizëda' lãdxi'tu' guntu' caní.

¹⁸ Que lë ni na' ca' gú'unitu' guídatu' ga zóali', ate' neda', Pablo, le nácatë bë' lãdxa'a guída' chopa

tsonna luzuí, pero Satanás, tu' xihui', buzaga' xinöztu'.

¹⁹ ¿Bizxi caz naca le run ga runtu' löza, o le run ga rudzėjatu', o le ral-la' idéli'tu', le uzí'itu' xibé lahué' Xanru' Jesucristo cate' huödë'? ¿Naru' cabí libí'i cázali' na'?

²⁰ Libí'i cázali' nácali' le run ga nácatu' bica' ba, en le run ga rudzėjatu'.

3

¹ Que lë ni na', cate' bíti'rö guca guá' ilentu', ben xtídza'tu' ugá'anatu' chópatu' lu yödzo Atenas,

² ate' gusól-la'tu'-bi' bi'i böchi'ru', Timoteo ga zóali'. Nácabí' bi'i huen dxin queë' Dios, en rúnlenbi' neda' tsözxön libán que didza' dxi'a queë' Cristo. Gusól-la'tu'-bi' ga zóali' para cuéqui' libí'ili' tsutsu, en ichízabi' icja nágali' ca ral-la' tséajlë'ëli' Cristo,

³ para cabí soa nu gaca chopá ladxi' ni'a que le tu'saca' zi' bönachi ni netu'. Nöz quézili' zóaru' yödzölió ni para guá' ilenru' le caní.

⁴ Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nöz quézili' lë na'.

⁵ Que lë ni na', cate' bíti'rö guca guá' ilena', gusól-la'a-bi' bi'i Timoteo ga zóali', para ududíxjö'ibi' neda' ca naca queëli' ca réajlë'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

⁶ Cate' buzá'abi' bi'i Timoteo ga zóali', en budx-inbi' ga zóatu', busiyönbi' netu' le naca dxi'a. Bë'ëbi' didza' ca na' réajlë'ëli' Cristo, en ca na'

nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queëli' röjnélica'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'.

⁷ Que lë ni na', böchi' luzá'atu', cate' ni' gudí'i guzxáca'tu' yúgu'të lë ni, en zían le guca queëtu', bidxín didza' queëtu' le buí'i zxôn netu' cate' biyönitu' ca réajlë'ëli'-në' Cristo.

⁸ Na'a, nuhuöaca ládxi'tu' tu' riyönitu' rö'öli' tsutsu ca réajlë'ëli'-në' Xanru'.

⁹ ¿Nacxi caz gaca guíëtu'-në' Dios: "Xclenu'" ca ral-la' guntu' ni'a que yúgu'të le run ga rudzeja ládxi'tu' lahuë' Dios queëru' ni'a que le nácali' libí'ili'?

¹⁰ Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queëli' ca naca le réajlë'ëli'-në' Cristo.

¹¹ Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'.

¹² Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'.

¹³ Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxe'ë Dios

¹ Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli'

ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

² Chinöz quézili' yugu' le gunná bé'etu' libí'ili' uláz queë Xanru' Jesús.

³ Le rě'ëně' Dios naca gácali' idú dxi'a, en bítirö gunli' le cabí naca tsahui',

⁴ en inözili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal.

⁵ Biti' ral-la' sóalenli'-nu nigula queéli' lu yöl-la' rizě ladxi' le ruá' dö', ca na' tun bönachi bití nabábagaca Dios, en bití' núnbē'gaca Dios.

⁶ Ca nácagaca lě ni, cuntu nu ral-la' tōdi bē', en cabí si' ye'e böchi' luzě'e bagáchi'sō, tu' ichúguiē' Lě cazē' Xanru' quégaca yúgu'tě nupa tun le caní, guně' ca na' chigúdxitu' libí'ili', en bentu' ba nalí que loli'.

⁷ Dios bulidzě' rě'u, calēga para gunru' le ruá' dö', pero para gácaru' idú dxi'a.

⁸ Caní naca, nu ruzóa tsölá'alö lě ni, calēga bönáchisö ruzóa tsölá'alö, pero Dios caz ruzóa tsölá'alö, tu' gusöl-lě'ë Lě cazē' Dios Bō' Lá'ayi queēru', Nu ruí'i caní didza'.

⁹ Biti' run bayudxi uzúaja' queéli' lu guichi ca ral-la' idxí'igacali'-ně' böchi' luzá'ali', tu' chinazédali' la' libí'isili' lu ně'ë Dios idxí'ili' luzá'ali' tuli' ia'tuli'.

¹⁰ Le nácatě nadxí'igacali'-ně' yúgu'tě böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacarōli'-ně' ca' yúgu'tě böchi' luzá'ali'.

¹¹ Ráta'yutu' loli' ca', güi'i ládxi'li' cōzali' dxí'ado', en gunli' yugu' le dē lu ná'asili', en gunli' dxin len

na'a cuinli' ca na' chigunná bé'etu' libí'ili'.

¹² Gunná bé'etu' libí'ili' caní para gaca gunli' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queéli'.

Ca gaca cate' huödë' Xanru' Jesucristo

¹³ Lësca', böchi' luzá'atu', rë'ënitú' inözili' ca raca quégaca nupa chinátigaca, para cabí huí'nili' ca tun ia'zica'rö bönachí bití' zoa le tun löza.

¹⁴ Channö réajlë'ëru' gútië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huödalengaca tsözxön Jesús nupa ni' chigulati, en gula'yéajlë' Lë'.

¹⁵ Que lë ni na' riguíxjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati."

¹⁶ Caní gaca, tu' huötjë' Lë cazë Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo.

¹⁷ Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalenticá'siru'-në' Xanru'.

¹⁸ Que lë ni na', guli'huí' zxön luzá'ali' tuli' ia'tuli' ca nácagaca didza' ni.

5

¹ Na'a, ca naca dza na', o rëla na' cate' ilaca lë ni, bití' run bayudxi uzúaja' queéli' lu guichi, böchi' luzá'atu'.

² Libí'ili' chinóz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzó'ölö.

³ Cate' ila'nná bönachi: "Raca dxi'a queëru', en biti' bi gaca queëru'", ní'rö la' idxintë le usuniti léguequi, lë na' idxín quéguequi ca na' ridxín le riguí'i rizáca'nu nigula na' chizóa sóabi' bí'ido' queënu, ate' cuntu nu nutsa' ladaj bönachi yödzülió ni nu ulá cate' gaca lë na' gaca dza na'.

⁴ Na'a, böchi' luzá'atu', biti' zóali' chul-la niti, en que lë ni na' biti' idxín dza ni' queëli' bagáchi'sö ca ridxinë' bönni' gubán.

⁵ Yúgu'tëli' nácali' bönachi que bení', en que lahui' dza. Biti' nácaru' bönachi que chi'i dzó'ölö, en calëga que le naca chul-la.

⁶ Que lë ni na', biti' ral-la' tödi yëla loru' ca raca quégaca nupa biti' nabábagaca rë'u, pero ral-la' usubán ládxi'ru', en cözaru' ba'a ládxi'do'.

⁷ Nupa tasi, chi'i dzó'ölö tasi, en nupa ta'zudxi, chi'i dzó'ölö ca' ta'zudxi.

⁸ Na'a, rë'u ni, nácaru' que lahui' dza, en ral-la' cözaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guié le run chi'i ícjaru'.

⁹ Caní naca, tu' nuzóë' Dios rë'u ni, calëga para idxinru' ga ichúguië' queëru', pero para uláru' tu' ruzxöni ládxi'ru'-në' Xanru' Jesucristo,

¹⁰ tu' gútië' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'.

¹¹ Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzë'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxi'li'.

¹³ Ráta'yutu' loli' ca', gunli' légaquië' bal lu yöl-la' nadxí'i queëli', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lësca' caní richízatu' icja nágali', böchi' luzá'atu', para usá'ali' ládxi'gaca nupa bití' túngaca dxin, en utípali' ládxi'gaca nupa tu'huöaj ládxi'guequi, en gácalenli' nupa bití' naca tsutsu ca ta'yéajlë' Cristo, en gácali' nöxaj ladxí' lógaca yúgu'të bönachi.

¹⁵ Guli'gún chí'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queëli', pero guli'güí' ládxi'li' gúntica'sili' le naca dxí'a que luzá'ali' tuli' ia'tuli', en quégaca yúgu'të bönachi.

¹⁶ Buli'dzéjatica'sö,

¹⁷ en buli'lídzatica'së' Dios,

¹⁸ en guli'guíë' Lë': "Xclenu'."

Caní ral-la' gunli' ni'a que yúgu'të le raca queëli', tu' nácagaca lë ni le rë'ënë' Dios gunli' tu' nácali' queë' Jesucristo.

¹⁹ Bití' uzóa dxili' le rulídzatica'së' Dios Bö' Lá'ayi libí'ili'.

²⁰ Bití' uzóali' tsólá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxí'a.

²² Bití' bi gútsa'li' le ruá' dö'.

²³ Lë cazë' Dios, Nu run ga zoa dxi icja ládxi'do'oru', gunë' ga gácali' idú dxí'a, en gun

chi'ë bö' naca cázali', en icja ládxi'do'oli', en idútë le nácali', ate' cuntu nu gaca bi innë queéli' dza ni' huödë' Xanru' Jesucristo.

²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigu'ë yugu' böchi' luzë'ë lu në'ë Dios

²⁵ Böchi' luzá'atu', buli'lidzë' Dios, en inábili'-në' gácalenë' netu'.

²⁶ Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

²⁷ Ni'a queë' Xanru' Dios ruchí'a libí'ili' ulábali' guichi ni lógaca yúgu'të böchi' luzá'aru' nabábagaquië' Cristo.

²⁸ Rinábida'-në' Xanru' Jesucristo uzá' ládxe'ë queéli' le nácgaca dxi'a queë'. ¡Ca' gaca!

Didza' cubi rucá¹ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25